

Programa introduci door di Prome Minister Eman ta sigui yuda hobennan

Grupo 6 di SVT a pasa su prome tres simannan cu exito y ta demostra nan famia nan logronan



ORANJESTAD(AAN): Social Vormingstraject su di seis grupo a finalisa su tres siman interno den Marinierskazerne y despues di e instalacionnan a bandona Savanetakemp pa pasa fin di siman na cas.

Ta trata di 18 hoben kendenan a logra pasa cu exito e prome tres simannan di SVT, cual tin un duracion di un aña. E programa SVT ta un iniciativa di Prome Minister Mike Eman, kende cu cooperacion di Ministerio di Defensa di Hulanda pa implementa esaki na Aruba. E programa Formacion Social ta conoci caba como un di e programanan mas exitoso pa formacion di hobennan na Aruba. E programa ta brinda hobennan cu no tin un diploma of un trabao un chens



nobo pa un miho futuro. E trayecto tin un duracion di un aña cu ta inclui training fisico bou guia di militar nan na Kazerne na Svaneta, hayando cursonan cu cooperacion di Enseñansa pa Empleo pa por mehora nan chens riba mercado laboral y tambe ta core stage na varios instancia

of companianan local. Grupo 6 diabierna mainta a finalisa su prome tres simannan interna na Marinierskazerne sin mira nan mayornan, pareha of amistadnan. Caranan yena di emocionnan tabatin cerca e participantenan di Grupo 6 pa demostra nan familiarnan tur loke cu nan a



siña e ultimo tres simannan, manera por ehempel den nan ta camufla pa biba den mondi, con pa traha den team pa completa un meta y duna demostracion di tecnicnan militar y practico. “Esaki ta nos cahita feliz cu mester dura nos 24 ora na momento cu nos ta den mondi,” un di e hobennan participante cu orguyo a splica familiarnan presente, mustrandone nan e cahita cu cuminda den dje. Importante den e prome tres simannan ta cu e “hobennan

ta siña disciplina y demostra respet pa otro. Pesey si den e fin di e siman aki nan no compartan nan mes segun nan a worde siña aki den, avisa nos mesora,” tabata comentario di diferente miembronan di staff di e programa SVT na mayornan.

Prome Minister Mike Eman semper a bisa cu e programa aki ta “duna oportunidad na hobennan cu kier duna contenido positivo na nan bida y yuda nan duna un aporte positivo na nos comunidad.”